



CHIESA EVANGELICA RIFORMATA
GRIGIONESE
BASELGIA EVANGELICA REFURMADA
DAL GRISCHUN
EVANGELISCH-REFORMIERTE
LANDESKIRCHE GRAUBÜNDEN
LOËSTRASSE 60, 7000 CHUR
TEL. 081 - 257 11 00, FAX 081 - 257 11 01
E-MAIL landeskirche@gr-ref.ch
HOMEPAGE www.graubuenden-reformiert.ch

Publicaziun nr. 677

Atun 2019

Il Cussegl da la baselgia evangelica preschenta a las suprastanzas da las plaivs ed als Colloquis las suandantas tractandas ed infurmaziuns per discussiun ed orientaziun.

Cuntegn

1. Consultaziun	4
1.1. Objects da tractar	4
2. Infurmaziuns e consultaziuns dal Cussegl da baselgia	4
2.1. La rolla da la procedura da consultaziun e da la cumissiun predeliberanta en la legislaziun	4
2.2. Publicaziun da regulativs da fondos e fundaziuns en la collecziun da leschas	7
2.3. Regulaziuns tar las casualias	7
2.4. Cumpetenzza per l'assistenza a commembers da la baselgia en casas da vegls e da tgira	8
2.5. Utilisaziun da la collecta da l'avust 2018	10
2.6. Projects grischuns per la collecta da l'avust 2020	11
2.7. Project da tschinquaisma 2019-2021	11
3. Comunicaziuns dal Decanat	12
3.1. Predicatur(a)s laic(a)s enfin la sinoda 2023	12
3.2. Liturgia per l'installaziun en l'uffizi	13
4. Consultaziuns da la direcziun dal Cussegl evangelic dal Grischun	13
4.1. Propostas per eleger duas cumissiuns predeliberantas	13
4.2. Propostas per eleger in commember da la cumissiun da gestiun (elecziun substitutiva)	14
5. Rapports colloquials	15
5.1. Furmar regiuns ecclesiasticas	15
5.2. Furmar raspada	17
5.3. Preparativas visitaziun ordinaria dals archivs 2020	17
5.4. Occurrenzias colloquialas	18
5.5. Instrucziun da religiun 2019/20	18

5.6. Moziuns, impuls e propostas	19
6. Diversas infurmaziuns	20
6.1. Resumaziun dals resultats dals colloquis da primavaira	20
6.2. Giubileums	20
6.3. Procedura tar posts vacants en uffizis da pravenda	21
6.4. Sesidas dal cussegl grond evangelic 2019/2020	21
6.5. Sesidas dal cussegl da baselgia 2019/2020	21
6.6. Termins dals colloquis d'atun 2019	22
6.7. Termins dals colloquis da primavaira 2020	22
6.8. Inoltrar ils protocols dals colloquis	22
Annexas (adressas)	24

1. Consultaziun

1.1. Objects da tractar

I na dat nagins objects da tractar.

2. Infurmaziuns e consultaziuns dal Cussegl da baselgia

2.1. La rolla da la procedura da consultaziun e da la cumissiun predeliberanta en la legislaziun


La nova constituziun da la baselgia chantunala ha surprindì per gronda part il dretg da consultaziun vegl da regiuns ecclesiasticas e Sinoda. Uschia ha la regiun ecclesiastica la cumpetenza da discutir e prender posiziun anticipadamain tar decrets ch'il Cussegl grond evangelic decida (art. 27, cif. 9 constituziun baselgia chantunala). La Sinoda da sia vart è cumpetenta da discutir ils sbozs da leschas (art. 41, cif. 9 constituziun). La legislaziun da la baselgia chantunala na regla betg explicitamain sch'il dretg da cundecider è d'applitgar en il medem mument, respectiv sch'i dovra ina procedura da consultaziun u betg, ed en tge successiun che quella sto vegnir fatga. En la pratica sur blers onns dal Cussegl da baselgia faschevan ins la consultaziun l'emprim en ils Colloquis ed alura en la Sinoda. En connex cun la revisiun totala da la constituziun n'han ins mai avisà ch'i fiss da midar la procedura d'enfin qua. La procedura en duas parts e sin dus stgalims è ina particularitad en la procedura legislativa e sa distingua da quella sin plaun politic.

L'uschè numnada "publicaziun" dal Cussegl da baselgia è enfin oz la basa per la consultaziun en las regiuns ecclesiasticas. En quella preschenta il Cussegl curtamain il project e trametta en ina aschunta il sboz dal decret. Tenor pratica sur blers onns decida il Cussegl da baselgia sa basand sin las respostas or dals Colloquis. El decida sch'i dat ina adattaziun u betg, en tge furma che quai duai succeder en vista a la consultaziun en la Sinoda sco era che quest sboz duai vegnir tramess sco basa ensemen cun l'invit a la Sinoda. Per betg retschaiver duas giadas las medemas rispostas s'impona quest proceder. Sch'il Cussegl da baselgia na dastgass betg adattar il sboz na faschess ina procedura da consultaziun sin dus stgalims strusch senn, pertge tut ils commembers da la Sinoda pon sa participar era a las sesidas colloquialas.

Suenter che la procedura da consultaziun è terminada decida il Cussegl da baselgia davart il sboz da la lescha e preschenta el cun in messadi al Cussegl grond evangelic (CGE). Per simplifitgar la discussiun en quest cussegl engascha il Cussegl da baselgia per regla sin proposta da sia direcziun ina cumissiun predeliberanta. Quella examinescha en detagl il sboz dal project e fa eventualas propostas per midadas. Quest proceder corrispunda a quel applitgà en il Cussegl grond politic. Basa da la lavur en la cumissiun furma il messadi dal Cussegl da baselgia cun il sboz da decret. I corrispunda dentant a la pratica d'enfin qua dal Cussegl da baselgia e e dal CGE (usual er en il Cussegl grond politic) che la cumissiun predeliberanta vegn elegida avant che l'executiva ha approvà ses messadi. La cumissiun entschaiva sa chapescha sia lavur pir cura ch'il messadi è a disposiziun.

Questa graduaziun dals termins sa resorta dal ritmus da sesidas en spezial dal CGE e da la Sinoda: Il CGE s'inscuntra mintgamai l'entschatta da zercladur e da november, la Sinoda

mintgamai la fin da zercladur. Sch'ins elegess la cumissiun predeliberanta pir cura ch'il messadi dal Cussegl da baselgia è a disposiziun, retardass quai la procedura legislativa per almain sis mais. Alura avess la discussiun en il CGE lieu pli che in onn sunter la consultaziun en ils Colloquis resp. en las regiuns ecclesiasticas. In tal retard fiss per ils commembers dal CGE fitg nuneffizient. Ina tala graduaziun è sulettamain giustificabla sch'il decret sto vegnir surluvrà considerablament sunter la consultaziun, u sch'el chaschuna in grond basigns da discussiun en la discussiun preliminar.



Ulteriuras infurmaziuns tar la procedura da la legislaziun da la Baselia chantunala chattan ins en l'ediziun 18/zercladur 2019 dal "Dialog intern" sin pagina 38. Quest atun 2019 vegn

il Cussegl da baselgia dal rest a preschentar ed explitgar anc ina giada las singulas fasas e la communicaziun respectiva, quai a chaschun da la preschentaziun da las lavurs per realisar la nova constituziun da la constituziun da la baselgia chantunala.

2.2. Publicaziun da regulativs da fondos e fundaziuns en la collecziun da leschas

La baselgia chantunala administrescha divers fondos e fundaziuns. Dal retgav da tals po il Cussegl da baselgia distribuir contribuziuns sco per exempel il “Fonds Lienhard Hunder” u il “Fonds für Kultur und Schrifttum”. Per ch’ils regulativs correspundents sajan averts e transparents per tuts, vegnan els recepids en la collecziun da leschas ecclesiasticas. Uschia pon petents per contribuziuns giuditgar oravant meglier sch’ina dumonda corrispunda als criteris u betg.

La collecziun da leschas ecclesiasticas po vegnir consultada da tuttas uras en la pagina d’internet da la baselgia chantunala (tar “downloads”). Tgi che posseda in ordinatur cun la versiun sin palpiri, retschaiva mintg’onn ina furniziun per cumpletar cun tuttas actualisaziuns.

2.3. Regulaziuns tar las casualias

Las plaivs èn confruntadas cun las pli diversas dumondas pertutgand casualias e funcziuns uffizialas. A la Sinoda 2017 a Glion (a basa dal rapport sur 10 onns) ed a la dieta sinodala da lavur 2019 (posiziun da prinzipi part. dumondas davart casualias) è la Sinoda s’occupada cun la tematica. Per pudair adattar en quest sector las reglaziuns giuridicas duajan ussa

suandar ils proxims pass. Ina resumaziun commentada da las reglaziuns giuridicas valaivlas sa chatta en la pagina d'internet da la baselgia chantunala tar downloads (cun il titel "casualias – indicaziuns giuridicas").

Il Cussegl da baselgia supplitgescha ils Colloquis e las plaivs da responder per mauns dal Decanat las suandantas damondas:

- 1) Cun tge damondas (spezialas) èn las plaivs / Colloquis confrontads en connex cun las casualias/funzioni uffizialas?
- 2) Tge damondas duajan vegnir scleridas il miglier sin tge stgalim ecclesiastic: sin stgalim da la plaiv (uffizi da pravenda e/u suprastanza) – regional – chantunal?
- 3) Tar tge texts giuridics existents vesain nus in basegn d'agir? En tge direcziun duajan las adattaziuns ir? Nua datti mancanzas?
- 4) Tge documents u cunvegns pertutgand la pratica da las casualias datti gia sin il stgalim da la plaiv u en il Colloqui?

Nus supplitgain ils Colloquis e las plaivs da trametter lur respostas ed ils documents correspundents **enfin ils 15 d'october** a la cancellara Ursina Hardegger (kanzellarin@gr-ref.ch).

2.4. Cumpetenzza per l'assistenza a commembers da la baselgia en casas da vegls e da tgira

Il Cussegl da baselgia ha retschavì la dumonda tgi che saja respunsabel ord vista persunala e finanziaria per l'assistenza ad abitantas/abitants da casas da vegls e da tgira e las funzioni uffizialas che èn colligadas latiers. Ins ha stuvì sclerir concretamain sch'igl è la vischnaunca oriunda da la persuna u la vischnaunca da domicil da l'instituziun. Tar

questa damonda ston ins resguardar dus aspects: D'ina vart la vista giuridica, latiers suandan gist ulteriuras explicaziuns. Da l'otra vart ils aspects pastorals. Là pon bunas cunvegrientschas tranter ils/las collegas involvad(as) probabelmain tegnair quint il miglier als basegns da las personas pertutgadas.

La situaziun giuridica sa preschenta sequentamain: Per l'assistenza pastorala e l'accumpignament a personas en casas da vegls e da tgira è da principi respunsabel l'uffizi da pravenda da la plaiv nua che la persuna è commembra. Decisiv per la commemoranza è il domicil uffizial d'ina persuna (art. 5 alinea 2 constituziun da la baselgia chantunala). Il dretg da la baselgia chantunala sa basa cunquai ad ina noziun dal dretg civil. Tenor art. 23, alinea 1 dal Cudisch civil svizzer sa chatta il domicil d'ina persuna en la vischnanca nua ch'ella ha l'intenziun da restar permanentamain. Sco quai che la medema disposiziun fixescha explicitamain, na stabilischa la dimora en ina casa da vegls e da tgira per sai persul naging domicil. Sche l'entrada (permanenta) en ina casa da vegls e da tgira ordaifer la vischnanca d'enfin qua duai valair sco midada da domicil, dependa da la voluntad da la persuna pertutgada. La manifestaziun externa da questa voluntad sa resorta da l'annunzia eventuala a la controlla d'abitants da la vischnanca politica. Sch'ins ha en vista ina midada da domicil, ha la persuna d'avisar sia partenza e da s'annunziar tar la nova vischnanca (midada da la vischnanca da domicil). Sch'ina midada da domicil n'è betg intenziunada, vegn la persuna importada en il register da la controlla d'abitants sco "residenta", il domicil (= sedia) resta en la vischnanca d'enfin qua.

Tar ina midada da domicil – damai ina midada tar l'uffizi da pravenda cumpetent – vegn la persuna registrada sco novdomiciliada. Per regla avess quai la conseguenza che la

vischnanca annunziass quai a la plaiv. En il cass da dubis po vegnir sclerì cun dumandar direct la vischnaunca.

Quests aspects giuridics furman la basa da partenza per las plevonessas ed ils plevons per reglar cunvegns concretas al lieu. Uschia pon ins garantir ad abitantas ed abitants da las casas da vegls e da tgira ina pastoraziun qualifitgada ed in bun accumpagnament.

2.5. Utilisaziun da la collecta da l'avust 2018

La collecta da l'avust 2018 ha purtà ina summa da radund 15'000 francs. Sin proposta dal Colloqui IX Partenz fiss ella stada destinada per in project d'ina chasa da scola da la Crusch blava en il pajais da Burkina Faso. Il mars 2019 èsi sa mussà che quest project na po betg vegnir realisà.

Il Cussegl da baselgia è da l'avis ch'ils daners da las collectas duajan vegnir impundids entaifer in temp util. Perquai ha el decidì da metter a disposiziun ils daners per in project da la Mission 21 che ha intenziuns sumegliantas.

Mission 21 sustegn in project da furmaziun en la republica democratica da Congo. Da cuminanza cun l'organisaziun-partenaria CEK (Communauté Evangélique du Kwango) s'engascha ella per ina meglra formaziun. La CEK porscha in program da svilup regional en ils secturs sanadad da basa, agricultura, scolaziun e formaziun da las dunnas. En il district Kasongo-Lunda maina Mission 21 cun la baselgia-partenaria CEK ina gronda rait da scolas. En plirs quartiers da povers da la chapitala Kinshasa ed en ina regiun grev cuntanschibla da la provinza Kwango maina ella pli che 150 scolas primaras e secundaras. A pli che 24'000 scolaras e scolaras pussibilitescha ella l'access ad ina meglia formaziun.

Il bliers edifizis da scola han las cuminanzas dals vitgs construì sezs cun bambus, arschiglia e feglia da palmas. Mintga trais onns ston ils bajetgs vegnir reconstruids. Las construcziuns magliadas da termitas na pon betg resister ad urizis e stemprads. Las tualettas consistan savens d'ina rusna en il ter-ratsch ed ina parait. Il 2018 han ins cumenzà a bajegiar a Kasongo ina nova chasa da scola secundara. Tenor infurmaziuns da Mission 21 avanza las lavurs bain.

2.6. Projects grischuns per la collecta da l'avust 2020

La collecta da l'avust vegn assegnada per ordinari entaifer il chantun. I vegnan sustegnids iniziativa da baselgias u ovras socialas en il Grischun. Il Cussegl da baselgia supplitgescha ils Colloquis da far propostas a tge projects ch'ins pudess destinar questa collecta. Nus supplitgain ils Colloquis dad inditgar las propostas en il protocol.

2.7. Project da tschinquaisma 2019-2021

La Baselia evangelic-refurmada dal Grischun ha elegì il project "Mbara Ozioma" sco project da Tschinquaisma per ils onns 2019-2021. Quatras sustegn era la cumissiun per ecumena, missiun e svilup (EMS) e Jacqueline Baumer dal post spezialisà EMS-baselgia mundiala il project da partenadi svizzer-nigerian da la fundaziun "Tür auf – mo vinavon" da Mustér/Disentis. Questa lavur è in project da pilot che è sa cumprovà fitg bain enfin qua. Ella sustegn l'iniziativa grischuna existenta d'ina plaiv u regiun ecclesiastica. En otg Colloquis han già lieu occurrenzas d'infurmaziun. Il viadi da project che vegn offerì mintg'onn cun in barat intercultural en

il center vegn a restar per tuts participants ina experientscha nunemblidaivla. Gugent rapportan els surlonder cun ina preschentaziun u ina sairada en lur plaivs u en las gruppas da la EMS. Divers referents èn era prompts d'infurmar dal project.

Il proxim viadi da "Mbara Ozioma" en il territori da project en il sid da la Nigeria è dals 19 d'avrigl enfin ils 1. da matg 2020. Per voluntaris interessands èsi la proxima chaschun da gidar al lieu en la vischnanca da Umunumo tar ils projects e d'emprender a conuscher pajais ed abitants da la Nigeria. Accent principal dal proxim viadi è la lavur da spitex ed il provediment medicinal da Mbara Ozioma. Da maniera facultativa pon ins anc prolungar la dimora per ina terza emna. Quella gruppa vegn a far il viadi tar il lieu da cult Yoruba a Oshogbo e visitar il project ecologic-agricol Songhai en il pajais vaschin Benin.

3. Comunicaziuns dal Decanat

3.1. Predicatur(a)s laic(a)s enfin la sinoda 2023

A chaschun da sia sesida dal matg ha il Decanat nominà da nov Karin Last, Colloqui VII, ed Ingrid Hansemann, Colloqui IX, sco predicaturas laicas per ils proxims quater onns. Plinavant ha el prolungà enfin la Sinoda 2023 la lubientscha da predicatur per Alex Schaub, Colloqui IX, e Martha Wellauer, Colloqui X. Il Decanat engrazia a las predicaturas d'enfin qua ed als novs predicaturs per lur servetsch per l'annunziaziun.

3.2. Liturgia per l'installaziun en l'uffizi

La cumissiun da liturgia da la Sinoda ha elavurà ina nova liturgia ed intginas recumandaziuns d'agir da duvrar per l'installaziun en l'uffizi da persunal en la pastoraziun en plaivs sco er uffizis da pravenda spezials. Quels meds vegnan cumplettads en l'ordinatur „Bündner Liturgie 2“. Quel cuntegn gia ina liturgia per l'installaziun en l'uffizi da commembers da la supranza da plaiv.

Ina installaziun festiva per ils uffizials elegids en la plaiv exprima la stima per las persunas che sa mettan a disposiziun per ina tala incumbensa. Ella accentuescha il caracter ecclesiastic spezial er da la lavur en supranza. Il Decanat encurascha tuttas plaivs d'installar, dasper las persunas da la pastoraziun, er lur commembers da supranza cun ina bella cerimonia festiva.

4. Consultaziuns da la direcziun dal Cussegl evangelic dal Grischun

4.1. Propostas per eleger duas cumissiuns predeliberantas

A chaschun da sia sesida dals 13 da november 2019 ha il Cussegl grond evangelic da convocar duas cumissiuns predeliberantas. Il regulativ da gestiun dal Cussegl grond evangelic constatescha latiers:

Art. 17 Cumissiuns predeliberantas

¹Per projects che pretendan ina examinaziun preliminar cun rapport elegia il Cussegl sin proposta da la direcziun cumissiuns predeliberantas.

²Questas cumissiuns predeliberantas sa cumponan, premess ch'il Cussegl na decida auter, da mintgamai tschintg commembers.

Per impedir retards tar la discussiun da las duas propostas du-ajan las elecziuns vegnir fatgas en la sesida d'atun.

La direcziun supplitgescha ils Colloquis d'inoltrar propostas per l'elecziun da las suandantas duas cumissiuns:

a) Cumissiun predeliberanta per la lescha davart las regiuns ecclesiasticas

Tschintg commembers

b) Cumissiun predeliberanta per la lescha da personal

Tschintg commembers

Proponids ed elegids pon vegnir sulettamain commembers dal Cussegl grond evangelic.

Persunas che èn gia sa declaradas prontas, èn da dumandar sch'ellas stettian vinavant a disposiziun. En cass che quellas stattan a disposiziun, èn ellas puspè dad inditgar.

La direcziun supplitgescha ils Colloquis d'inditgar en il protocol da la radunanza colloquiala candidatas e candidats cun adressa exacta.

4.2. Propostas per eleger in commember da la cumissiun da gestiun (elecziun substitutiva)

Reverenda Stephan Bösiger, Sta. Maria, banduna la fin da l'onn il chantun Grischun. En sia sesida dal november sto il

Cussegl grond evangelic perquai far ina elecziun substitutiva en la cumissiun da gestiun per la perioda d'uffizi 2018/2022.

Proponids ed elegids pon vegnir sulettamain commembers dal Cussegl grond evangelic.

La direcziun supplitgescha ils Colloquis d'inditgar candidatas u candidats cun adressa exacta en il protocol da la radunanza colloquiala.

5. Rapports colloquials

5.1. Furmar regiuns ecclesiasticas

L'onn current cuntinuescha l'emprima etappa da las preparativas per furmar las regiuns ecclesiasticas. En las plaivs ed ils Colloquis sto vegnir discutà tge incumbensas che pon vegnir schliadas singul e tgeninas da cuminanza. Er ils cunfins da las regiuns pon vegnir definids da nov en cumparegliaziun cun ils Colloquis. Finamira da quest emprim pass èsi da metter sin maisa propostas per crear las regiuns ecclesiasticas e da preschentar in emprim resun or da las radunanzas da plaiv.

Il Cussegl da baselgia supplitgescha las suprastanzas colloquialas da far in **rapport da la situaziun** e da trametter quel **enfin ils 31 da december** a l'actuariat (ursina.hardegger@gr-ref.ch). Il rapport duai includer:

- Incumbensas principalas da las regiuns ecclesiasticas,
- plaivs partizipadas,
- num da la regiun ecclesiastica,
- resuns da las radunanzas da plaiv.

Per che la basa da lavur per ils proxims pass saja preparà èsi planisà da metter a disposiziun quest atun sco planisà ils statuts da model per las regiuns ecclesiasticas. Damai ch'il CGE

vegn probabel a tractar ed approbar l'onn proxim la lescha davart las regiuns ecclesiasticas, ston ins eventualmain far pli tard adattaziuns. Quellas pertutgan dentant be paucs puncts, pertge ils elements principals ha la constituziun gia derterminà.

En vista a la creaziun da regiuns ecclesiasticas ha il Cussegl da baselgia udì da constattaziuns fallidas che ston vegnir corrigidas. La constituziun da la Baselia chantunala surdat a las suprastanzas colloquialas l'incumbensa da suttametter propostas per la futura creaziun d'ina regiun ecclesiastica. La decisiun da furmar ina regiun ecclesiastica è en la cumpetenzza da las plaivs, damai che quellas s'uneschan tar regiuns ecclesiasticas. La radunanza colloquiala n'ha en questa procedura nagina funcziun da veto. Ella po cunquai betg impedir la separaziun d'in Colloqui sin pliras regiuns ecclesiasticas cun refusar ses consentiment.

Medemamain è la dumonda vegnida sch'ins haja adattà il plan da termins per stgaffir las regiuns. Quel ha la constituziun determinà, la decisiun dal Cussegl grond evangelic d'instituir pir il november la cumissiun predeliberanta davart la lescha correspudenta, n'ha damai nagina influenza.

Il post spezialisà "svilup da las cuminanzas" e l'actuariat èn gugent a disposiziun per scleriments u cussegliaziuns en chaussa. Il Cussegl da baselgia spera ch'ins chattia bunas furmas e modas da luvrar per quest nov stgalim mesaun. Els engrazian a tuts che investischan lur temp ed energia per sviluppar vinavant nossa Baselia chantunala.

5.2. Furmar raspada

Questa tractanda survescha al barat da projects planisads e realisads en connex cun *Furmar raspada* en las plaivs entaifer il Colloqui. Intent èsi da render enconuschent projects sur ils cunfins da la plaiv.

5.3. Preparativas visitaziun ordinaria dals archivs 2020

Sa basand sin art. 6 dal regulativ per l'installaziun e l'organisaziun dals archivs da las plaivs prescriba il Cussegl da baselgia mintga tschintg onns ina **visitaziun ordinaria** da tut ils archivs (partiziuns uffizis da pravenda e plaiv). Ina tala è puspè da far l'onn 2020. Nus supplitgain ils Colloquis d'incumbensar a chaschun da la radunanza d'atun ina u pliras personas cun questa visitaziun. Sche pussaivel duai la medema persona far las visitaziuns en tuttas vischnancas dal territori colloquial.

Il Cussegl da baselgia supplitgescha las suprastanzas da plaiv da procurar ch'i dettia per la visitaziun 2020 in register cumplet da l'archiv (in register dal cuntegn). Etichettas autocollantas e sdrimas da chartun per marcar las novas archivalias pon ins retrair tar l'administraziun da la Baselia chantunala.

Per las visitaturas ed ils visitaturs ch'ils Colloquis han elegì vegn ina cumissiun d'archivs da la Baselia chantunala ad organisar ina infurmaziun. Il Colloqui indemnisescha las visitaturas ed ils visitaturs conform al regulativ 821.

Tar mintga midada en l'uffizi da pravenda datti ina **visitaziun d'archiv extraordinaria** per il sector da l'archiv da pravenda.

Questa lavur exequescha in commember da la cumissiun d'archivs da la Baselia chantunala. Il Cussegl da baselia supplitgescha las suprastanzas dals Colloquis da far atenziun ch'ins annunzia al president da la cumissiun d'archivs, Peter Wydler, avant la partenza d'in plevon/plevonessa, provisura/provisur (adressa en l'annexa). Tenor regulativ 821 surpren la plaiv ils custs per la visitaziun.

Quatras engrazia il Cussegl da baselia explicit per tut quità ed atenziun ch'ins dat als achivs.

5.4. Occurrenzas colloquialas

Il Cussegl da baselia spetga il rapport davart las occurrenzas colloquialas ch'èn stadas dapi il Colloqui d'atun 2018, sco conferenzas pastorals, retratgas, occurrenzas da perfecziunament professiunal, festas ecclesiasticas e.a.v. En la publicaziun da primavaira vegnan talas infurmaziuns numnadas.

Il Cussegl da baselia supplitgescha ils Colloquis dad inditgar tar la glista da las conferenzas pastorals medemamain las tematicas tractadas. Sulettamain ina enumeraziun dals termins na fa nagin senn. Ils rapports valan per auters colloquis sco bursa d'ideas. Indicaziuns davart referentas/referents sco era las tematicas tractadas èn perquai in agid.

5.5. Instrucziun da religiun 2019/20

Il Cussegl da baselia rimna, atras ses post specialisà per la pedagogia da religiun, era per quest onn da scola las datas per l'instrucziun da religiun.

Sch'i sa mussan en l'onn current da scola en las plaivs problems pertutgand l'instrucziun da religiun renda il Cussegl da

baselgia attent a la pussaivladad da s'adressar direct a Maria Thöni, la manadra dal post spezialisà (adressa guarda annexa).

5.6. Moziuns, impuls e propostas

Tenor art. 21 cif. 3 da la constituziun da la Baselgia evangelica-refurmada dal chantun Grischun po il Colloqui trametter vinvant al Cussegl da baselgia moziuns, impuls e propostas. Quai po sulettamain il Colloqui, e betg singuls colloquials.

I sto esser cler ed evident sch'i sa tracta d'ina *moziun*, in *impuls* u ina *proposta*:

- Ina *moziun* che vegn acceptada chaschuna ina midada da lescha.
- In *impuls* è ina idea concreta ed elavurada, ella determinescha finamiras e mesiras pussaivlas.
- Ina *proposta* è ina idea, tge che pudess vegnir fatg en in certa sparta determinada.

Tar tuttas moziuns, impuls e propostas d'in Colloqui sto esser inditgà il resultat exact da la votaziun.

Sch'il Cussegl da baselgia accepta *moziuns*, preschenta el quellas per consultaziun als Colloquis ed a la Sinoda. Alura suonda ina discussiun finala en il Cussegl grond evangelic. Moziuns che vegnan approbadas, chaschunan ina midada da la lescha. Refusa il Cussegl da baselgia moziuns, motivescha el quai en il rapport uffizial.

Sch'il Cussegl da baselgia accepta *impuls* e *propostas*, po el prender sez mesiras en quest senn e realisar talas. Refusa il Cussegl da baselgia impuls e propostas, motivescha el era quai en ses rapport uffizial.

6. Diversas infurmaziuns

6.1. Resumaziun dals resultats dals colloquis da primavaira

Per l'infurmaziun da tut ils colloquials cumpara en quest lieu ina resumaziun da las discussiuns e conclus tar ils objects tracandads, sco era moziuns, impuls e propostas ch'il Cussegl da baselgia ha retschavì durant ils colloquis da primavaira.

Las moziuns ed ils conclus ch'ils Colloquis han inoltrà la primavaira al Cussegl da baselgia, han pertutgà las consultaziuns da la lescha davart las regions ecclesiasticas e la lescha da personal. Il Cussegl da baselgia ha discutà ellas durant la repassada dals sbozs ed integrà quellas en il sboz da la consultaziun per mauns da la Sinoda.

6.2. Giubileums

Las suprastanzas dals Colloquis e da las plaivs pon annunziar al Cussegl da baselgia giubileums da lavur (20, 25 u 30 onns da servetsch) d'employadas ed employads ecclesiastics e collavuraturas e collavuratur voluntaris.

Ins po aschuntar las annunzias al protocol colloquial u trametter ellas sco annunzia separada a scrit a l'actuar dal Cussegl da baselgia, Peter Wydler (adresa guarda en l'annexa). Las giubilaras u giubilar retschaivan, dasper la renconuschientscha da la plaiv u il colloqui, in document uffizial dal Cussegl da baselgia. Tgi che lavura pli ditg che 20 onns per ina plaiv e finescha ussa l'actividad per quella, pon ins medemamain annunziar, ella u el retschaiva medemamain il document uffizial. Igl è indispensabel d'inditgar il num cumplet e l'adresa dal

giubilar/la giubilara scu er sia funcziun e la durada exacta da l'engaschament.

6.3. Procedura tar posts vacants en uffizis da pravenda

En la pagina d'internet da la Baselia chantunala pon ins clamar giu sut www.gr-ref.ch/downloads in fegl d'infurmaziun en connex cun la procedura recumandada pertutgand l'occupaziun nova d'in uffizi da pravenda (guarda sut l'indicaziun «Pfarrpersonensuche, Checkliste»).

6.4. Sesidas dal cussegl grond evangelic 2019/2020

Mesemna, 13.11.2019 (entir di), sala dal Cussegl grond

Mesemna, 03.06.2020 (**entir di**), sala Comander

Mesemna, 11.11.2020 (entir di), sala dal Cussegl grond

6.5. Sesidas dal cussegl da baselia 2019/2020

Il Cussegl da baselia s'inscuntra ina giada il mais. Giavischs a quel duessan vegnir annunziads a l'administraziun almain trais emnas avant il termin da la sesida.

Termins da las sesidas 2019: 22 d'avust, 19 da settember, 24 d'october, 21 da november, 12 da december.

Termins da las sesidas 2020: 16 da schaner, 20 da favrer, 12 da mars, 16 d'avrigl, 14 da matg, 4 da zercladur, 2 da fanadur, 20 d'avust, 17 da settember, 22 d'october, 19 da november, 10 da december.

6.6. Termins dals colloquis d'atun 2019

Colloqui I	Sur gl'Uaul	18 da sett.
Colloqui II	Schons-Avras-Valrain-Moesa	18 da sett.
Colloqui III	Sut gl'Uaul	25 da sett.
Colloqui IV	Cuira	17 da sett.
Colloqui V	Segneradi-Tschintg Vigts	18 da sett.
Colloqui VI	Scanvetg-Churwalda	18 da sett.
Colloqui VII	Engiadin'Ota-Bregaglia- Poschiavo-Sursès	11 da sett.
Colloqui VIII	Engiadina Bassa-Val Müstair	18 da sett.
Colloqui IX	Partenz	18 da sett.
Colloqui X	Tavau-Alvra	13 da sett.

6.7. Termins dals colloquis da primavaira 2020

Nus supplitgain las actuaras ed ils actuars d'inditgar en il protocol ils termins dals colloquis da primavaira.

6.8. Inoltrar ils protocols dals colloquis

La sesida dal Cussegl da baselgia cun l'evaluaziun dals protocols dals Colloquis è l'october. Ils acts latiers vegnan tramess il settember.


Per che nus possian far l'evaluaziun essan nus engraziaivels sche Vus tramettais il protocol uschè svelt sco pussaivel en furma electronica (sco datoteca word, betg scannà) a l'actuara-substituta dal Cussegl da baselgia, **Ursina Hardegger** (addressa en l'annexa).

Ils protocols suttascrits en furma da palpiri inclus las aschuntas tramattai p. pl. enfin ils 30 da settember medemamain a l'actuara-substituta.

Preavis: il termin per inoltrar ils protocols dals colloquis da primavaira 2020 vegn ad esser ils 15 d'avrigl.

Cuira, avust 2019

Cussegl da baselgia evangelic



Andreas Thöny
president



Peter Wydler
actuar

Annexas (adressas)

Actuar dal Cussegl da baselgia

Ser Peter Wydler
Loëstrasse 60, 7000 Chur
081 257 11 00
kirchenratsaktuar@gr-ref.ch

Actuara-substituta dal Cussegl da baselgia, cancelliera (Decanat)

Plevonessa Ursina Hardegger
Loëstrasse 60, 7000 Chur
081 257 11 00
ursina.hardegger@gr-ref.ch

Post specialisà pedagogia da religiun

Maria Thöni
Loëstrasse 60, 7000 Chur
081 257 11 00
maria.thoeni@gr-ref.ch
Kirchliche Mediothek: www.mediogr.ch

Post specialisà per il svilup da las cuminanzas

Jacqueline Baumer / Johannes Kuoni
Loëstrasse 60, 7000 Cuir
081 257 11 00
jacqueline.baumer@gr-ref.ch / johannes.kuoni@gr-ref.ch

Pagina d'internet da la Baselgia chantunala

www.gr-ref.ch
Infurmaziuns e support guarda «Downloads».